

社會組  
臺灣客家語 詩佳作



親情就像海恁深（四縣腔）

【乖乖睡目】

睡目睡目  
阿哥搨你  
你愛乖乖睡目

睡目睡目  
夢裡肚  
有 靚靚个蝶仔好捉  
有 煮到香—香—香个包粟（黍）

睡目睡目  
你愛乖乖睡目  
夢裡肚  
有 光光个細蠟燭  
有 盡生趣个節目  
白雪公主  
也會  
同你共下走相逐

【煎卵】

下晝點零鐘 阿姆還未轉  
肚屎咕嚕嚕  
佢來學煎卵

第一隻卵無細義  
啪嘍一聲跌落地  
實在還受氣

第二隻卵敲落碗  
煎來煎去  
煎到烏烏一團

第三隻卵慢慢煎  
火開細 搨啊搨（反）  
豆油淋落去  
噴噴香 好味緒  
大家食到笑嘻嘻

【老弟个枕頭】

佢个枕頭頂背  
有一條大貓牯  
阿姐个枕頭頂背  
繡兩隻烏仔  
還有一頭大樹

較好个枕頭  
都毋當細老弟  
佢个枕頭  
係阿姆該支軟軟个手

### 【阿婆个生日】

阿婆个生日  
屋下盡鬧熱  
男女老嫩 大家都轉臺北  
當像過春節

縣長送一對祝壽个字墨  
僱送一張自家畫个阿婆  
佢暢到奈毋得  
阿爸送機票分佢旅行出國  
阿姨送个襖袍盡靚盡特別

阿婆个頭那毛白雪雪  
細老妹問佢  
今年幾多歲  
阿婆笑到嘿嘿嘿  
佢講  
舊年十八歲  
今年毋記得

### 創作理念

不管課業多麼重，不管工作多麼累，也不管在外頭受到了多少的委屈。家，永遠是每一個人心靈停靠的港灣。

快到家門，腳步就輕快了起來。回到家裡，心情就快樂了起來。因為家是一個充滿親情和愛的地方。

也許是媽媽說晚安故事，也許是哥哥哄妹妹睡覺，也許是在床上打枕頭戰，也許是在廚房學煎蛋，也許是一家人歡歡喜喜的慶祝生日快樂，也許是……。笑在每一個人的臉上，甜在每一個人的心裡。

因為——親情就像海那樣的深！

邱雲忠

明臺出版社總編輯

